



## Extrait de la revue **SingulierS** du 1<sup>er</sup> trimestre 2007

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

**Rubrique : Textes**

### Li tins ki passe... Èt mi, la d'dins ?

Jean-François DUCKERTS  
(wallon de Marche)

C' èst l' Tossint. Achîs dins l'èglîje, dji choûte... Anfin, dji m' sovin k' dji choûtéve, ô début todi...  
Pace ki après, pus rin ! Vo m' la vôle !

Ooooh ! Ça n' èst nin pace ki l' curè racontéve dès couyes, hin si an cas ! Nèni ! I djâzéve dès  
vikants, dès mwârts... Dès mwârts di l'antikitè... Dès mwârts ki ont moru i gn-a seûlmint kékès  
samwin.nes... Dès mwârts ki vikèt co, dins nos tièsses, nosse keûr, nos sondjes...

Mês rin à fé ! Avou on sèrmon ki mache li prézint èt l' passè, mi, dji n' è pou rin : dji m' anvole !

Ci djoû-là, dj' èstéve vôle èksplorè on sujèt ki m' turlupine, k' èst todi la, dins on ptit cwin di  
m'tièsse : li tins ki passe !

C' è-st-on sujèt co pus vaste ki l' internèt'. Cand dji pète èvôle la ddins, nin dandjî d' sori po  
surfè su mès neûrônes. Po tûzè a ça, nin dandjî d' èsse vî è pansionè : li conteûr do tins atake dès  
k' to broches fou do vinte di t' mère èt k' to brâyes po l' prèmi côp.

Mi, dji sù co djon.ne... anfin, dins m' tièsse ! Mès-èfants, zés, i m' font todi arèdjè : « Popa, t'es  
vieux ! » Bin âye ! Dji n' va nin leûs-î foute one togrnole po ça : dj' è 47 ans ; zès, i nn-ont co k' 20,  
18, ou 13... Min.me si dj' è co todi l' carte vèrte ô contrôle tèknike, c' èst vrê ki dji sù vî por zés !

N' ampêche, a ç' momint la, dji m' veû avancè. Come on martchand d' vatches, dji saye di  
m'èstimè : èst ç' ki dji sù dèdja ô bout, ou seûlmint ô mitan...? Kibin d' an.nèyes èst ce k' on m' a  
dnè ? Come dji sù optimisse, dj' è todi anvê d' dire 100, po wôrdè l' moral ou po fè on conte  
rond... Bon, nos-alans dire antre 70 èt 100... Adjujè !

Di toutes façons, ki ça sèye 70, 100, èt ça sèrèût min.me 300... Di toutes façons, c' èst  
parèy : ça n' fêt jamês ki kékès dîzin.nes d'an.nèyes a vikè : c' èst coûrt ! C' èst coûrt, mès an  
min.me tins, c' èst mistérieûs ! Mistérieûs èt atirant...!

Dj' èstéve a Bayeux ol fin do mwès d' aousse. Dji m' sintéve to ptit divant l' catédrale. To t' rins  
conte : èlle a stî fête dins lès-an.nèyes 1100, par la... Li tapis'rie, co parèy ! Èt tot ça, c' èst todi la !  
Ooooh ! Cès machins la, i-z ont u dol chance : i n' ont nin stî broûlès, pièrdous, volès ou  
bombardès ! Ça vout dire ki, po z-arivè jusk' a nos-ôtes, on lès-a brâmint rfêts, rtayès,  
racomodès... Min.me po dès pîres, ou dès tapis, po dès-objèts ki n' vikèt nin, i fôt one chance di  
tos lès djâles èt dès ptits swins po dmore 1000 ans.



Dins l' Bible, ou dins les livres istorikes, to pous aprinde dès tas d'aféres su les Grècs, les-Ejipcyins, les Cèltes, les Suméryins, les-Indo Eûropéyins, ... Dji dmeûre todi su m' cou cand dji m'rind conte k' on cnot tos cès djins la sins les-aveûr jamès vèyou, cès djins la ki sont mwarts dispus lontins, mès ki ont scrît, ki ont bâti dès monumints, èt tot ça. Et ça date di 2000, 5000, 10000 ans... La, dji m' di todi : one vie d' ome, ça n' dûre wére dins l' istwâre do monde.

Alans co pus lon ! Avou les moyins siantifikes modèrnes, i gn-a dès cis ki ont rtrouvè Lucy, nosse vi grand mère d' Afrike, èt co dès-ôtes pa t't-avô an-Afrike ou an-Amèrike ! Ça, c' èst dès supêr vîs, sés' : i-z-ont gagnè ô loto, on conte leû âdje an millions, ti ! Èt portant, cand on veût çou qui dmeûre di zés... Kékès-ochês, rin d'ôte ! Eco, on-a u dol chance di les trovè.

« To n' as co rin vèyou ! Tès millions d' ans, c' èst du pipi d' chat ! » Cwa, k' èst-ç' k' i dit, ci-la !? Ah bon ! C' è-st-on-astronome ! C' èst vrê ki les-astronomes, avou les télèscopes, i vèyèt co pus lon ki dès millions d' an.nèyes, zés. Atincion, voci ! Mi ptit cervô cmince a tchôfè a s' fè crèvè. Les galaksies, èles sont a dès miliârs d' an.nèyes-lumière di nos-ôtes télmint k' èles sont lon. Eles sont télmint lon ki, cand to les veûs a ç't-eûre, to veûs leû îmadje d' i gn-a 5, 10 ou 13 miliârs d'an.nèyes. To fés on voyèdje dins l' tins èt dins l' èspace an min.me tins, sins boudjè di t' fôteûy !

Eco bin ki dji sù achîs ! Cand dji veû mi vèye tote coûrte a costè d' ça, ça m' done li vèrtje... Et mi ? Est ç' k' on-ôrè co dès fotos d' mi dins 1000 ans ? Oufti, 1000, c' èst djà brâmint... Alè, dîjans an l' an 2100, tyins... Vu di d' ci, ça sèreût dèdja bin ! A condicion ki les fotos su papî ni broûlinche nin... Ki les-arière pètit-èfants ni les-ayinche nin tapè ô contènèr... Ou ki mès fotos sèyinche co su l' DVD, ou l' bazâr k' on va invantè après, po wôrdè m' mémwâre jusk' a la !

Mès min.me s' i n' dimeûre pu nole trace di mi dins kékès-an.nèyes, min.me si m' vèye ni dûre wére à costè dol vèye di l'univèrs, dj' ôrè u bon pace ki dj' ôrè pu sinte èt dvinè, an soulevant on ptit cwin do ridô, tos les mistères èt totes les ritchèsses do monde.

Li mèsse dol Tossint èst finie ! Il èst tins d' rivni su tère, èt d' alè fé l' toûr dès tombes ! Dji vè nn-aveûr dès-aféres a leûs-î racontè... Mès moutwè ki dji n' leûs-î apudrè rin, ô mwârts !

#### Malêjis mots

**brotchè fou** = jaillir / **choûtè** = écouter / **moutwè** = peut-être / **nole** = aucune / **oché** = os / **tûzè** = réfléchir / **wôrdè** = garder